

# FEDERALNO MINISTARSTVO ZDRAVSTVA

9

Na osnovu člana 111. Zakona o zdravstvenoj zaštiti ("Službene novine Federacije BiH", broj 29/97), federalni ministar zdravstva, donosi

## PRAVILNIK

### O DODATNOJ EDUKACIJI IZ PORODIČNE MEDICINE

#### I - OSNOVNE ODREDBE

##### Član 1.

Ovim pravilnikom utvrđuje se sadržaj i način provođenja dodatne edukacije iz porodične medicine (u daljem tekstu: edukacija), uvjeti koje moraju ispunjavati zdravstveni radnici koji pristupaju edukaciji, odnosno zdravstvene ustanove i druge ustanove koje obavljaju edukaciju, kao i način provjere znanja.

##### Član 2.

Edukacija iz člana 1. ovog pravilnika predstavlja organizirani oblik teoretskog i stručno-praktičnog osposobljavanja doktora medicine i medicinskih sestara-tehničara za pružanje zdravstvenih usluga iz oblasti porodične medicine.

Edukacija se obavlja pod nadzorom Federalnog ministarstva zdravstva (u daljem tekstu: Ministarstvo), odnosno ustanove koje odredi Ministarstvo, a s ciljem unapređenja kvaliteta pružanja zdravstvenih usluga iz oblasti porodične medicine, pojedincu i porodicama u lokalnoj zajednici, bez diskriminacije u pogledu rase, boje kože, spola, jezika, vjeroispovijesti, političkog ili drugog mišljenja, nacionalnog ili socijalnog porijekla, imovine, rođenja, bolesti ili drugog statusa.

#### II - UVJETI ZA PRISTUPANJE EDUKACIJI

##### Član 3.

Zahtjev za edukaciju može podnijeti pojedinac ili zdravstvena ustanova za uposlenika - doktora medicine, doktora medicine - specijalistu, kao i višu, odnosno srednju medicinsku sestru-tehničara, odnosno nositelj odobrenja za obavljanje privatne prakse.

Doktoru medicine može se odobriti edukacija iz člana 1. ovog pravilnika ako ispunjava slijedeće uvjete:

- da ima završen medicinski fakultet;
- da je položio stručni ispit;
- da posjeduje licencu za rad izdatu od nadležne komore;
- dokaz o poznavanju jednog stranog jezika.

Ukoliko zahtjev za edukaciju podnosi doktor medicine - specijalista, pored uvjeta navedenih u stavu 2. alineja tri ovog člana, potrebno je priložiti i uvjerenje o položenom specijalističkom ispitu.

Višoj, odnosno srednjoj medicinskoj sestri-tehničaru može se odobriti edukacija iz člana 1. ovog pravilnika, ukoliko ispunjava slijedeće uvjete:

- da ima završenu višu, odnosno srednju medicinsku školu;
- da ima položen stručni ispit;
- da posjeduje licencu za rad izdatu od nadležne komore.

#### Član 4.

Zahtjev za edukaciju iz člana 3. ovog pravilnika podnosi se Ministarstvu.

Na osnovu podnijetog zahtjeva, a po provedenom postupku, federalni ministar zdravstva (u daljem tekstu: federalni ministar) donosi rješenje.

Rješenje donijeto u smislu stava 2. ovog člana je konačno.

### III - PLAN EDUKACIJE

#### Član 5.

Edukacija iz člana 1. ovog pravilnika obavlja se po planu koji je utvrđen ovim pravilnikom.

Planom se utvrđuje pregled nastavnih jedinica i njihovo trajanje koje je doktor medicine, doktor medicine - specijalista, viša, odnosno srednja medicinska sestra-tehničar (u daljem tekstu: polaznik edukacije) dužan obaviti u pojedinim organizacionim jedinicama.

Plan edukacije sastavni je dio ovog pravilnika (Prilog 1.).

### IV - NAČIN OBAVLJANJA EDUKACIJE

#### Član 6.

Teoretski dio edukacije obavljaju zdravstvene ustanove i druge ustanove koje ispunjavaju slijedeće uvjete u pogledu prostora, opreme i kadra, i to da imaju:

- najmanje jednu prostoriju za održavanje nastave, koja ispunjava higijensko-tehničke uvjete namijenjene za učionice;
- sanitarni čvor u blizini prostorija za nastavu, i to odvojeno za potrebe ženskih i muških polaznika edukacije;
- prikladan namještaj u učionici;
- stručni kadar za održavanje teoretske nastave: specijalisti određenih grana medicine iz zemlje ili inostranstva, doktori medicine opće prakse sa završenom edukacijom iz porodične medicine, kao i viša odnosno srednja medicinska sestra-

- tehničar sa završenom edukacijom iz porodične medicine, koji uz to posjeduju i dokaz o pedagoškim vještinama;
- potrebnu opremu i nastavna pomagala neophodna za održavanje teoretske nastave.

#### Član 7.

Praktični dio edukacije obavlja se u centrima porodične medicine u Federaciji Bosne i Hercegovine (u daljem tekstu: Federacija), odnosno u zdravstvenim ustanovama koje ispunjavaju slijedeće uvjete u pogledu prostora, opreme i kadra, i to:

- da postoje organizacijske jedinice prema zahtjevima pojedinog dijela programa edukacije;
- da organizaciona jedinica ima potrebnu medicinsko-tehničku opremu i prostor za uspješno provođenje programom predviđenog osposobljavanja prema zahtjevima savremene medicine;
- da u toj organizacionoj jedinici u punom radnom vremenu radi:
  - a) doktor medicine - specijalista obiteljske medicine, odnosno specijalista odgovarajuće grane medicine, odnosno doktor medicine koji je završio edukaciju iz obiteljske medicine, a zadužen je za pružanje edukacije, po odredbama ovog pravilnika, doktoru medicine, odnosno doktoru medicine -specijalisti,
  - b) viša medicinska sestra-tehničar sa završenom edukacijom iz porodične medicine, zadužena za pružanje edukacije, po odredbama ovog pravilnika, višoj, odnosno srednjoj medicinskoj sestri-tehničaru.

#### Član 8.

Federalni ministar rješenjem utvrđuje koje zdravstvene ustanove, odnosno druge ustanove u Federaciji ispunjavaju uvjete za obavljanje teoretskog i praktičnog dijela edukacije iz čl. 6. i 7. ovog pravilnika.

#### Član 9.

Edukacija po odredbama ovog pravilnika traje jednu školsku godinu.

Edukacija se, u pravilu, obavlja u redovnom radnom vremenu.

Edukacija najmanje traje šest sedmica, po osam sati dnevno, i to jednu sedmicu u toku mjeseca.

V - NAČIN PROVJERE ZNANJA, SASTAV I RAD ISPITNE KOMISIJE, KAO I IZDAVANJE UVJERENJA O USPJEŠNO ZAVRŠENOJ PROVJERI ZNANJA IZ PORODIČNE MEDICINE

## Član 10.

Centar porodične medicine, odnosno zdravstvena ustanova, nakon uspješno provedene edukacije, vrši teoretsku i praktičnu provjeru znanja polaznika edukacije.

Po završetku edukacije provjeru znanja polaznika edukacije obavlja komisija koja se sastoji od tri člana.

Članove komisije imenuje federalni ministar iz reda stručnjaka koji su provodili edukaciju.

Predsjednik komisije je, u pravilu, doktor medicine - specijalista porodične medicine, odnosno specijalista druge odgovarajuće grane medicine.

## Član 11.

Provjeri znanja može pristupiti samo onaj polaznik edukacije koji je redovno pohađao nastavu iz teoretskog i praktičnog dijela.

Provjera znanja iz stava 1. ovog člana obavlja se, u pravilu, usmeno, na način koji omogućava stvarno utvrđivanje potrebnog znanja o porodičnoj medicini.

U toku provjere znanja vodi se zapisnik u koji se unose lični podaci lica čije se znanje provjerava i podaci o sadržaju provjere.

## Član 12.

Provjeri znanja može se pristupiti najviše dva puta, s tim da između provjera znanja mora proteći najmanje 15 dana.

U slučaju da polaznik edukacije i nakon druge provjere znanja ne zadovolji, upućuje se na ponovno obavljanje edukacije.

## Član 13.

Ukoliko polaznik edukacije ne postigne uspjeh ni nakon druge provjere znanja, centar porodične medicine, odnosno zdravstvena ustanova koja je organizirala provjeru znanja dužna je izvijestiti o tome zdravstvenu ustanovu, odnosno nositelja odobrenja za privatnu praksu kod kojeg je polaznik edukacije uposlen, kao i nadležno ministarstvo zdravstva.

## Član 14.

Centar porodične medicine, odnosno zdravstvena ustanova koja je organizirala provjeru znanja dužna je najkasnije u roku od sedam dana dostaviti zapisnike o provjeri znanja i drugu potrebnu dokumentaciju, a radi izdavanja uvjerenja o uspješno završenoj provjeri znanja iz porodične medicine (u daljem tekstu: uvjerenje).

Polazniku edukacije koji je uspješno završio provjeru znanja iz porodične medicine, federalni ministar izdaje uvjerenje iz stava 1. ovog člana.

Uvjerenje potpisuje federalni ministar i predsjednik Ispitne komisije.

Sadržaj i izgled uvjerenja sastavni je dio ovog pravilnika (Prilog 2.).

Nakon dobijenog uvjerenja, polaznik edukacije stiče pravo da u svom stručnom zvanju radi u timu obiteljske medicine.

#### Član 15.

Troškove edukacije, kao i završne provjere znanja utvrđuje federalni ministar posebnim rješenjem.

Troškove edukacije, kao i završne provjere znanja snosi zdravstvena ustanova, odnosno nositelj odobrenja za obavljanje privatne prakse koji je uputio polaznika edukacije na edukaciju saglasno odredbama ovog pravilnika.

Polaznici edukacije koji obavljaju edukaciju u svojstvu volontera, sami snose troškove edukacije, kao i završne provjere znanja.

#### Član 16.

O polaznicima edukacije koji su uspješno završili provjeru znanja Ministarstvo vodi evidenciju.

### VI - PRELAZNE I ZAVRŠNE ODREDBE

#### Član 17.

Zdravstvenom radniku koji je obavio edukaciju iz porodične medicine u Federaciji, odnosno izvan teritorije Federacije, kao i u inostranstvu, priznaje se plan i program obavljene edukacije, kao i uspješno završena provjera znanja nakon obavljene edukacije.

#### Član 18.

Priznavanje edukacije iz člana 17. ovog pravilnika, vrši federalni ministar, na osnovu podnijetog dokumentovanog zahtjeva zdravstvenog radnika.

Uz zahtjev iz stava 2. ovog člana prilaže se:

- diploma o završenom fakultetu, višoj, odnosno srednjoj školi zdravstvenog usmjerenja ili njena ovjerena fotokopija, ako je fakultet, viša, odnosno srednja škola završena u inostranstvu, uz ovjerenu diplomu dostavlja se i nostrifikacija diplome, odnosno svjedodžbe;

- plan i program obavljene edukacije iz porodične medicine ovjeren od strane organa koji ga je donio, a ako je u pitanju plan i program iz inostranstva, prijevod istog sa ovjerom ovlaštenog prevodioca.

#### Član 19.

Na osnovu podnijetog zahtjeva po provedenom postupku, federalni ministar donosi rješenja.

Rješenje donijete u smislu stava 1. ovog člana je konačno.

#### Član 20.

Implementaciju odredaba ovog pravilnika prati savjetodavni organ imenovan od strane federalnog ministra, iz reda istaknutih stručnjaka u oblasti porodične medicine, kao i drugih grana medicine.

Savjetodavni organ iz stava 1. ovog člana dužan je da proučava implementaciju edukacije po odredbama ovog pravilnika, te daje i predlaže stručna mišljenja iz područja planiranja, programiranja i drugih bitnih pitanja iz edukacije porodične medicine, a koji su od značaja za Federaciju.

#### Član 21.

Ovaj pravilnik stupa na snagu osmog dana od dana objavljivanja u "Službenim novinama Federacije BiH".

Broj 01-37-106/03  
9. januara 2003. godine  
Sarajevo

Ministar  
prim. dr. **Željko Mišanović**, s. r.

**PLAN EDUKACIJE  
IZ PORODIČNE MEDICINE**

**A - Teoretski dio:**

- 1) predavanja, diskusije sa trenerima i demonstratorima 30% sati
- 2) rješavanje slučajeva za vrijeme teoretskog dijela i na radnom mjestu sa demonstratorima 40% sati
- 3) individualno učenje u ambulantama 30% sati

**B - Praktični dio:**

- 1) dnevni rad ambulante 60% sati
- 2) diskusije i rad sa demonstratorima 35% sati
- 3) istraživački rad 05% sati

**Pregled nastavnih jedinica**

Nastavna jedinica 1: Konferencija za sve učesnike

Nastavna jedinica 2: Sesija menadžmenta promjena

Nastavna jedinica 3: Dijabetes - odvojene sesije za Reviziju prakse (audit) DM

Nastavna jedinica 4: Vještine komunikacije

Nastavna jedinica 5: Kardiovaskularni sistem I dio: bol u grudnom košu, EKG i sl.

Nastavna jedinica 6: Izvještaji revizije prakse (audita) Sindromi anksioznosti

Nastavna jedinica 7: Pulmonalni problemi - odvojene sesije: prestanak pušenja

Nastavna jedinica 8: Gastrointestinalni problemi - odvojene sesije

Nastavna jedinica 9: Pedijatrijski problemi - odvojene sesije Adolescentski problemi

Nastavna jedinica 10: Izvještaji revizije prakse (audita) vezanog za prestanak pušenja, depresija - odvojene sesije

- Nastavna jedinica 11: Zdravlje žena - odvojena sesija;  
papa test screening
- Nastavna jedinica 12: Konferencija na polovini trajanja edukacije
- Nastavna jedinica 13: Zdravstvena zaštita starije populacije - odvojene sesije
- Nastavna jedinica 14: Genitourinarni i dermatološki problemi - odvojene sesije
- Nastavna jedinica 15: Onkologija - palijativna njega - odvojene sesije
- Nastavna jedinica 16: Izvještaj revizije prakse (audita) vezanih za papa test screening  
PTSD
- Nastavna jedinica 17: Kardiovaskularni sistem II dio - odvojene sesije; Hipertenzija -  
revizija prakse (audit)
- Nastavna jedinica 18: Kardiovaskularni sistem III dio - odvojene sesije. Ishrana I dio.
- Nastavna jedinica 19: Izvještaji revizije prakse (audita) hipertenzija ujutro.  
Upotreba alkohola i droga, nasilje u porodici.
- Nastavna jedinica 20: Muskuloskeletni problemi - Neurologija I dio - odvojene sesije
- Nastavna jedinica 21: Muskuloskeletni problemi II dio - odvojene sesije.  
Ishrana II dio.
- Nastavna jedinica 22: Dani evaluacije



**BOSNA I HERCEGOVINA  
FEDERACIJE BOSNE I HERCEGOVINE  
FEDERALNO MINISTARSTVO ZDRAVSTVA**

Broj: .....

Mjesto: .....

Na osnovu člana 14. Pravilnika o dodatnoj edukaciji iz porodične medicine ("Službene novine Federacije BiH", broj 1/03), federalni ministar zdravstva izdaje

**UVJERENJE**

**o dodatnoj edukaciji iz porodične medicine**

.....,  
(prezime, očevo ime, ime) (stručno zvanje)  
rođen-a.....,  
(dan, mjesec, godina) (mjesto) (općina)  
..... nakon uspješno završenog teoretskog i  
(država)  
praktičnog dijela edukacije iz porodične medicine za  
....., pristupio-la je dana .....  
(stručno zvanje)

godine završnoj provjeri znanja pred Ispitnom komisijom Federalnog ministarstva zdravstva.

Komisija je ocijenila da je kandidat uspješno završio provjeru znanja iz dodatne edukacije porodične medicine, te time stekao pravo da u svom stručnom zvanju radi u timu porodične medicine.

PREDSJEDNIK KOMISIJE

\_\_\_\_\_

MINISTAR

\_\_\_\_\_

M.P.